



2

GIPUZKOAKO LURRALDE HISTORIKOKO ADMINISTRAZIOA

GIPUZKOAKO FORU ALDUNDIA

OGASUN ETA FINANTZA DEPARTAMENTUA

518/2021 Foru Agindua, irailaren 18koa, zeinaren bidez onesten baita kooperatiben sustapen eta heziketa funtsaren erabilerari 2021ean aplikagarri zaion interpretazioa, COVID-19aren ondorioak arintzeko.

Martxoaren 8ko 2/2005 Foru Arauak, Gipuzkoako Lurralde Historikoko Zergen Foru Arau Orokorrak, 11. artikuluko 3. apartatuan ezartzen duenez, Foru Aldundiaren eskumenen esparruan, zerga arloko foru arauak eta gainerako xedapenak interpretatu edo argitzeko xedapenak emateko ahalmena Ogasun eta Finantza Departamentuko foru diputatuari dagokio soil-soilik.

Xedapen horren babesean, irailaren 29ko 380/2020 Foru Aginduen bidez Ogasun eta Finantza Departamentuko foru diputatuak ebatzi zuen ezen, Euskadiko Kooperatibei buruzko abenduaren 20ko 11/2019 Legearen 72. artikuluan kooperatiben heziketa eta sustapenerako eta interes publikoko beste helburu batzuetarako ezartzen den kontribuzioaren zenbatekoak apirilaren 21eko 15/2020 Errege Lege-Dekretuaren 13. artikuluan adierazitako helburuetara bideratzen zituzten kooperatibek ez zutela galduko, arrazoi horregatik, fiskalki babestutako kooperatiben izaera. Gainera, kasu horietan ere ez zen ulertzen horrela aplikatutako zenbatekoak diru sarrerak direnik kooperatibentzat.

Maiatzaren 4ko 8/2021 Errege Lege-Dekretuak, zeinaren bidez presako neurriak hartzen baitira osasun, gizarte eta jurisdikzio arloan, alarma egoeraren indarraldia amaitu ondoren aplikatzeko (alarma egoera hori urriaren 25eko 926/2020 Errege Dekretuak deklaratu zuen, SARS-CoV-2ak eragindako kutsatzeen hedapena geldiarazteko), 12. artikuluan 2021eko abenduaren 31ra arte malgutzen du kooperatiben heziketa eta sustapen funtsari eman dakioken erabilera, COVID-19aren ondorioak aritze aldera.

Irailaren 29ko 380/2020 Foru Agindua onestea eragin zuten arrazoiak xedapen hau justifikatzen duten berberak dira. Ondorio horietarako, 2021eko irailaren 8an egindako txostenean Eusko Jaurlaritzako Laneko eta Gizarte Segurantzako sailburuordeak ondorioztatu du Euskadiko Kooperatibei buruzko abenduaren 20ko 11/2019 Legearen mende dauden kooperatibei arazorik gabe aplikatu dakiekeela lehen aipatutako 8/2021

Errege Lege-Dekretuaren 12. artikulua, 1. eta 2. zenbakietan araututa dauden terminoetan.

Horrek esan nahi du ezen «kooperatiben heziketa eta sustapenerako eta interes publikoko beste helburu batzuetarako kontribuzioaren» zenbatekoak helburu hauetara bideratu ahal izango direla, osorik edo zati batean:

a) Finantza baliabide gisa, kooperatibari likidezia emateko, bere funtzionamendurako beharrezkoa izanez gero.

Ondorio horietarako, kooperatibak funtsa itzuli beharko du, gutxienez urte bakoitzean sortzen diren erabilera libreko emaitzen % 30arekin, haren aplikazio ez-ohikoa erabakitzeko unean Funtsak zeukan zenbatekora iritsi arte, eta gehienez ere, hamar urteko epean.

b) COVID-19aren osasun krisia edo haren ondorioak arintzen lagundu dezakeen edozein jardura egiteko, dela ekintza propioen bidez, dela beste entitate publiko edo pribatuei dohaintzak eginez.

2021eko abenduaren 31ra arte, eta, salbuespen gisa, Zuzendaritza Kontseiluak bere gain hartu ahal izango du heziketa eta sustapen funtsaren aplikazioa onesteko eskumena, 1. apartatuan aurreikusitako terminoetan, baldin eta, baliabide egokirik edo nahikorik ez izateagatik, sozietate kooperatiboen Batzar Nagusia biltzeko deialdia ezin bada bitarteko birtualen bidez egin.

Kooperatiben Zerga Erregimenari buruzko maiatzaren 22ko 2/1997 Foru Arauaren 12.3 artikuluan xedatutakoa aintzat hartuta, non esaten baita ezen Euskadiko Kooperatibei buruzko ekainaren 24ko 4/1993 Legearen 68. bis artikuluan (abenduaren 20ko 11/2019 Legearen 72. artikuluan gaur) kooperatiben heziketa eta sustapenerako eta interes publikoko beste helburu batzuetarako ezarrita dagoen kontribuzioaren zenbatekoak artikulua horretan aurreikusten ez diren helburuetarako erabiltzeak fiskalki babestutako kooperatiben izaera galtzea dakarrela, eta, orobat, arau horren 17.4 artikuluan xedatutakoari erreparatuta, bertan ezartzen baita kontribuzio hori onartuta ez dauden helburuetarako erabiltzeak fiskalki babestutako kooperatibaren izaera galtzea ekartzeaz gainera, bidegabeki aplikatutako zenbatekoa diru sarreratzat hartzea ere ekarriko duela berekin (artikulu horretan baldintzak ezartzen dira kooperatiben heziketa eta sustapenerako eta interes publikoko beste xede batzuetarako bideratutako nahitaezko kontribuzioa gastu kengarritzat hartzeko), zilegi da foru agindu interpretatibo bat ematea, haren bitartez argitzeko 8/2021 Errege Lege-Dekretuaren 12. artikuluan ezarritako erabilerak, artikulua horren 1. eta 2. zenbakietan araututako terminoetan, ez duela berekin ekarriko fiskalki babestutako kooperatiben izaera galtzea.

Horrenbestez, hau

EBAZTEN DUT

Lehenengo. Kooperatibek maiatzaren 4ko 8/2021 Errege Lege-Dekretuaren 12. artikuluan adierazitako helburuetara bideratzen badituzte Euskadiko Kooperatibei buruzko abenduaren 20ko 11/2019 Legearen 72. artikuluan kooperatiben heziketa eta sustapenerako eta interes publikoko beste helburu batzuetarako ezarritako kontribuzioaren diru kopuruak (errege lege-dekretu horren bitartez presako neurriak hartzen dira arlo sanitario, sozial eta juridikzionalen), kooperatibek ez dute galduko,

arrazoi horrengatik, fiskalki babestutako kooperatiben izaera. Gainera, kasu horietan ere ez da ulertuko horrela aplikatutako zenbatekoak diru sarrerak direnik kooperatibentzat.

Bigarren. Martxoaren 8ko 2/2005 Foru Arauak, Gipuzkoako Lurralde Historikoko Zergen Foru Arau Orokorrak, 11. artikuluko 3. apartatuan xedatutakoan oinarrituta, foru agindu honek ondorio lotesleak izango ditu Zerga Administrazioako organo guztientzat «Gipuzkoako ALDIZKARI OFIZIALEAN» argitaratzen den egunetik aurrera.

Donostia, 2021eko irailaren 18a.—Jokin Perona Lerchundi, Ogasun eta Finantza Departamentuko foru diputatua.

(6114)